



YR HEUWR

CYLCHGRAWN MISOL EGLWYS HOREB PENRHYN-COCH
CYFROL 2 RHIF 14
GORFFENNAF/AWST 2008

Ym mis Awst eleni, cynhelir un o ddigwyddiadau pwysicaf y flwyddyn ym mhen arall y byd, yn Beijing, China. Er yr anghyfiawnderau dynol a chrefyddol yn y wlad honno, diau y bydd llygaid llawer un wedi'u hoelio'n fanwl ar yr achlysur.

Felly, gyda'r Chwaraeon Olympaidd ar y trothwy, tybed faint ohonoch chi a welodd y ffilm ragorol honno, "Chariots of Fire?" Y prif gymeriad yw Eric Liddell, Sgotyn ifanc a anwyd yn Tientsin, China, a'i rieni ar y pryd yn gweithio fel cenhadon yno. Yr oedd hi'n ddymuniad gan y mab, hefyd, i fynd yn genhadwr gan y gwyddai fod Duw wedi'i alw i'r gwaith ond, yn ogystal, credai Eric Liddell fod Duw wedi rhoddi'r ddawn iddo i redeg yn gyflym. Meddai, "Pan wyf yn rhedeg, teimlaf ei fod yn ymhyfrydu ynof. Byddai rhoi'r gorau i redeg yn gyfystyr â dirmygu Duw." Ymhen hir a hwyr, fe ddychwelodd y gwibiwr ifanc i China i genhadu a bu farw yno mewn gwersyll i garcharorion, ond nid cyn ei fod wedi rhedeg y ras dros Dduw yn y Chwaraeon Olympaidd yn Paris yn 1924, pryd yr enillodd y fedal aur yn y 400 metr gan dorri record y byd.

Y mae gennym ninnau hefyd ras i'w rhedeg mewn bywyd. Cawn ein hatgoffa o hynny yn Ail Lythyr Paul at Timotheus, llythyr a ddisgrifiwyd fel "yr un mwyaf teimladwy" o'i holl lythyrau. Sonia Paul am y pwysigrwydd o ddal ati yn ras fawr bywyd: "Yr wyf wedi ymdrechu'r ymdrech lew, yr wyf wedi rhedeg yr yrfa i'r pen, yr wyf wedi cadw'r ffydd." (2 Timotheus 4:7). Nid oes dim sy'n guddiedig nac astrus yn y gosodiadau yma ac y mae'r hyn a ddywed yr Apostol yn gwbl glir. Y mae bod yn Gristion yn golygu dioddef i'r eithaf, y mae'n golygu ymdrechu i'r eithaf yn erbyn y drygioni sydd o'n mewn ac o'n cwmmpas ymhob man. Ond er gwaetha'r anawsterau y mae'n bosibl llwyddo, dim ond i ni gadw'n golwg yn sefydlog ar Grist Iesu ein Harglwydd, yr hwn yntau a ymddygnodd i'r eithaf.

Wrth gwrs, nid yw'r ras fyth wedi'i hennill hyd nes y byddwn wedi croesi'r llinell derfyn ac am hynny ni ddylai unrhyw beth beri i ni laesu dwylo ac ymlacio ar hyd y ffordd. Ymhlith y damhegion mwyaf treiddgar a lefarodd yr Arglwydd Iesu, y mae'r rhai sy'n cyfeirio at fethiant y rhai hynny a oedd wedi dechrau'r daith yn dda ond na lwyddodd i ddal ati hyd y diwedd (Luc 14:25-33, Mathew 13:5-6, 20-21; 25:8-10). Er i ninnau hefyd addo bod yn ffyddlon i'r Arglwydd Iesu, parod iawn ydym i droi cefn arno a'i adael. Efallai mai geiriau mwyaf trasig yr Efengyl yw'r rhai a lefarodd Iesu wrth y Deuddeg pan oedd hi'n ymddangos na ddymunent ei ddilyn mwyach, "A ydych chwithau hefyd, efallai, am fy ngadael?" (Ioan 6:67).

Y mae gwobr i'r Cristion am gwblhau'r ras. Gwyddai'r Apostol Paul fod y dorch a roddir am gyfiawnder ar gadw iddo ac y byddai'r Arglwydd Iesu, y Barnwr cyfiawn, yn ei chyflwyno iddo pan ddeuai ei yrfa i ben. Neu, a defnyddio ieithwedd y Chwaraeon Olympaidd, y mae'r ras drosodd a'r enillydd ar y llwyfan yn disgwyl cael ei goroni ger bron y dyrfa. "Ardderchog, fy ngwas da a ffyddlon...tyrd i ymuno yn llawenydd dy feistr" (Mathew 25:21).

Daliwn ati. Rhedwn y ras i'w therfyn. Enillwn y dydd. Derbyniwn y wobr.

Pob bendith

Judith

Dalier Sylw! Cyfeiriad a Rhif Ffôn Newydd :

Berwynfa, Penrhyn-coch, Aberystwyth, SY23 3EW

Rhif Ffôn: (01970) 820939

e-bost: morris@coedlas.plus.com

CALENDR MISOEDD GORFFENNAF/AWST

Cyhoeddwr y Mis :	William Howells
6 Gorffennaf 10.30 2.30	Clwb Sul Oedfa Gymun : Gweinidog
13 Gorffennaf 10.30	Oedfa Deuluol : Gweinidog
20 Gorffennaf 2.30	Oedfa ar y Cyd gyda Bethel – yn Horeb- i groesawu ein cenhades gyswllt.
27 Gorffennaf 10.00	Oedfa Gymun : Gweinidog
3 Awst 10.00 a 6.00	Seion : Parchedig Elfed ap Nefydd Roberts
10 Awst 10.00 a 6.00	Bethel : Parchedig Gwenda Richards
17 Awst 10.00 a 6.00	Morfa : Parchedig D Ben Rees
24 Awst 10.00 a 6.00	Seion : Parchedig Hugh Mathews
31 Awst 10.00 a 6.00	Bethel : Parchedig Emyr Gwyn Evans
7 Medi 10.30 2.30	Clwb Sul Oedfa Gymun : Gweinidog

I'CH DYDDIADUR

7 Gorffennaf : Cinio Cymorth Cristnogol : Ebenezer Penparcau : 12.00-1.30

14 Gorffennaf : Cyfarfod Diaconiaid Horeb : 7.30

16 Gorffennaf : Cymdeithas Bethel: Dr Lionel Madden i annerch am 2.00

3 Awst : Oedfa yn Ysbyty Bronglais am 3 o'r gloch o dan ofal y Gweinidog. Cysylltwch â Judith os hoffech ddod i'r oedfa hon.

3 Medi : Cymun Canol Dydd ym Methel : 12.00

16 Medi: Cyfarfod Blynnyddol Mudiad y Chwiorydd, Ebenezer, Llandeilo. 1.30 a 6.00.

1 Hydref : Cyfarfod Diolchgarwch Horeb : 7.00

LLOFFION

Llongyfarchiadau i :

- Lisa Healy ar ennill y drydedd wobr yn Eisteddfod yr Urdd am ganu Alaw Werin
- Dafydd Shephard ar ddod yn Gynghorydd Cyngor Plwyf Trefeurig
- Henry, Mairwen a Sandra ar gael eu hethol a'u neilltuo yn ddiagoniaid.
- Cemlyn ar ennill gradd dosbarth cyntaf.
- Bethan a Jeremy a fydd yn dathlu eu priodas arian.
- Non a Colin ar ddod yn fam-gu ac yn ddat-cu gyda dyfodiad Nel, baban Lisa a Rhys.

Cydymdeimlwn yn ddwys â :

- Janice a'r teulu ar golli ei mam yn ddiweddar.
- Connie a'r teulu ar golli perthynas i'w thad.

Diolch i :

- Côr Cantre'r Gwaelod, Gwenno ac Anwen am gynnal cyngerdd yn Horeb er budd Cymorth Cristnogol. Diolch yn fawr iawn hefyd i'r aelodau a gyfrannodd i'r noson mewn unrhyw ffordd.
- Pawb a fu wrthi yn casglu yn ystod wythnos Cymorth Cristnogol o gwmpas y pentref. Cyfanswm y casgliad o ddrws i ddrws, cinio bara caws yr Eglwys a'r cyngerdd yn Horeb oedd £1283-48.

Trefniant Beddau

Bu'r swyddogion yn ystyried yn ddiweddar ym mha le y bydd beddau newydd yn cael eu torri yn y fynwent. Os oedd gennych unrhyw gytundeb â swyddogion blaenorol yr eglwys ynglŷn â lleoliad bedd, byddwch garediced â chysylltu yn ddiymdroi â Mr Mervyn Hughes neu Mr Richard Wyn Davies. Diolch yn fawr.